

Familiarization, Internalization, Articulation (FIA) Key Terms © 2025 Word Collective Released under CC BY-SA 4.0 license. Familiarization, Internalization, Articulation (FIA) Key Terms has been adapted in the following languages Tok Pisin, عربي, Français, हिंदी, Bahasa Indonesia, Português, Русский, Español, Kiswahili, 简体中文 from Familiarization, Internalization, Articulation (FIA) © 2025 Word Collective. Released under CC BY-SA 4.0 license by Mission Mutual

A

abba

Aba em i wanpela hap tok long tok ples bilong ol lain Aram we i min olsem “papa.” Tok Aram em i tok ples bilong ol lain **Israel** long taim bilong Jisas. Jisas i kolim God olsem “aba” taim em i **pre** i go long God bipo long ol i holimpasim em na **krusifaim em**. Bihain Pol i bin raitim insait long ol leta bilong em olsem **Holi Spirit** i save mekim yumi i tok “aba, fada!” long God. Dispela em i min olsem bikos long Holi Spirit, yumi ken stap wantaim God olsem wanpela pikinini na papa bilong em-wankain tasol olsem rilesensip we Jisas i bin gat wantaim papa bilong em.

abraham

Abraham em i bin namba wan tumbuna man bilong **ol lain Israel**, dispela em **ol Ju** o long Tok Pisin em ol i kolim ol olsem ol Judaman. Nem bilong Abraham em i bin Abram, tasol God i senisim dispela nem i go long Abraham. Abraham em i min olsem “papa bilong planti nesen o lain manmeri.”

Abraham i bin stap laip long klostu tu taunsen yia bipo long Jisas i bon. Pastaim em i bin stap long wanpela rijen ol i kolim Ur, na dispela rijen em i stap long hap ist long **Israel**. Papa bilong Abraham em Terah na em i bin kisim ol pikinini man bilong em wantaim ol meri bilong ol na i lusim Ur, bikos em i laik go long kantri we ol i kolim **Kenan**, tasol em i bin stop long wanpela ples ol i kolim Haran. Dispela ples em i longwe liklik long Kenan. Famili bilong em i bin stap long hap, na bihain long sampela taim, papa bilong Abraham i bin dai. Abraham na famili bilong em i no bin save long God; ol i bin save **wosipim o lotuim ol piksa nating**.

Taim Abraham i gat 75 krismas, God i bin toktok long em. God i tokim em long lusim as ples bilong em, na go long wanpela ples we God bai soim long em. God i tok olsem em bai **blesim** Abraham, na em bai mekim wanpela bikpela **nesen o lain manmeri** i kamap long Abraham, na God bai yusim Abraham long blesim olgeta lain manmeri long olgeta hap bilong God. Na Abraham i harim tok bilong God! Em wantaim meri bilong em Sara na pikinini bilong brata bilong em Lot na ol i kirap lusim ples na ol i go. Taim em i kam long Kenan, God i tokim em olsem dispela em i kantri we God bai givim i go long Abraham na **ol lain tumbuna** bilong em.

Tasol, Abraham i no gat tumbuna pikinini yet. Em i bin nogat pikinini, na em i lapun man pinis! Tasol em i **bilipim** promis bilong God. Na God i bin amamas

tru long trast bilong Abraham, olsem na em i lukim Abraham olsem wanpela man we i ken gat gutpela rilesensip wantaim.

Tasol Abraham i nid long wet longpela taim bipo long God i givim em pikinini. Em i bin wet 25-pela moa yia, na long dispela taim em i mekim sampela misteik o asua na sampela taim em i lus tingting long trastim God. Tasol bihain, taim Abraham i gat 100 krismas na meri bilong em Sara i gat 90 krismas, Sara i karim wanpela pikinini man. Abraham na Sara i bin amamas tru! Na ol i kolim pikinini man bilong ol, “Aisak,” we i min olsem lap.

Orait, bihain long sampela yia, God i givim Abraham wanpela hatpela test o traim. God i tokim Abraham olsem em i nid long sekrifaisim pikinini man bilong em Aisak. Em i nid long kilim Aisak, na kukim em olsem wanpela presen i go long God! Tasol nau Abraham i bin lainim tru tru long trastim God, na em i harim tok. Na taim Abraham i apim naip bilong em long kilim pikinini man bilong em, God i stopim em na God i preisim Abraham! Na God i tok olsem bikos Abraham i bin soim olsem em i trastim God tru tru na i harim tok bilong God, nau dispela blesing we God i bin promisim long givim long Abraham em bai kontinu i go long Aisak tu, na kontinu i go long ol narapela lain manmeri i kamap long Abraham. God bai yusim ol lain tumbuna bilong Abraham long blesim olgeta lain manmeri long olgeta hap bilong graun.

Orait, Aisak i kamap bikpela na i bin gat tupela pikinini man. Yangpela pikinini man em Jakob. Bihain, nem bilong Jakob i senis i go long Israel. Jakob, o Israel, i bin gat 12-pela pikinini man. Ol lain tumbuna bilong ol dispela pikinini man i bin kamapim ol 12-pela traib o hauslain bilong Israel. Ol i kamap wanpela bikpela nesen o lain manmeri. Na wanpela bilong ol tumbuna bilong ol em Jisas! Na insait long Jisas, olgeta manmeri long olgeta hap bilong graun i kisim blesing. God i bin inapim o fulfilim promis bilong em i go long Abraham!

adonai

Dispela wod **Adonai** em i wanpela wod long tok ples Hibu, na Hibu em i wanpela tok ples bilong Olpela Testamen. Adonai em i min osem bikpela, o masta. Ol **Judaman o Ju** i save yusim dispela wod olsem wanpela taitel bilong soim rispek taim ol i toktok long God.

adultery

Adaltri o pasin bilong raun wantaim ol marit manmeri em i wanpela kain **sin** long sait bilong seks. God i lukim dispela pasin olsem wanpela sin taim ol

manmeri i slip raun o i gat seksual rilesensip wantaim wanpela man o meri we ol i no maritim, tasol insait long olupela testamen, dispela wod adaltri em ol i save yusim long toktok long wanpela kain pasin. Sapos wanpela man i slip wantaim o i gat seksual rilesensip wantaim wanpela meri husat i bin marit long narapela man, dispela man na meri wantaim i mekim pasin adaltri. Panismen bilong pasin adaltri em dai. Tasol, sapos man i reipim wanpela meri, man tasol i mas dai.

Taim wanpela man i gat seksual rilesensip wantaim wanpela meri we i no marit o **sleiv o wok meri nating**, em i sakim tok o i no bihainim tok, o i mekim sin agensim God, tasol Olpela Testamen lo i tok olsem, dispela sin em i no kam aninit long ol sin adaltri.

God i save les tru o heitim tru adaltri na olgeta kain seksual sin. Planti taim God i save komperim pasin bilong ol manmeri i sakim tok wantaim pasin bilong adaltri. Taim ol manmeri i no bilip long God na i stat long **wosipim o lotuim ol piksa nating** na giaman god, ol i wok long mekim ol pasin wankain olsem wanpela man o wanpela meri husat i no save stap tru long man o meri bilong ol. Olsem na God i save kolim pasin bilong lotuim ol piksa nating o ol narapela god, olsem wanpela kain pasin adaltri.

Insait long Nupela Testamen, Jisas i mekim ol lo bilong adaltri i kamap strong moa. Em i tok olsem sapos wanplea man o meri i **tingting** long hevim seks o slip wantaim wanpela man o meri we em i no maritim, orait em i mekm in pinis.

advocate

Wanpela **edvoket** em i wanpela man o meri husat i save makim narapela lain na toktok. Wanpela edvoket i save laik long helpim wanpela man o meri o wanpela grup husat i stap insait long trabel na i laik long mekim pasin we i no wansait. Eksampel, sapos wanpela man o meri i toktok long gavman bilong kantri na askim sapos dispela gavman i ken mekim moa samting long helpim ol turangu lain, orait em i wok long edvoket long ol turangu lain.

Insait long wanpela kot keis, wanpela edvoket i save tok pait o difendim dispela man o meri we ol lain i tok olsem em i brukim lo. Dispela edvoket i ken tokim jas olsem dispela man o meri em i no mekim rong o em i inosen na i noken kisim mekim save o panismen, o edvoket i ken tokim kot olsem dispela man o meri em i sori tru long wanem samting em i bin mekim, o em i no bin min long mekim dispela samting. Wanpela edvoket i save traim long mekim jas i givim liklik panismen tasol, o i no givim wanpela panismen olgeta.

altar

Wanpela **alta** em i wanpela ples we ol manmeri i save mekim **ol ofaring o ol sekrifais** i go long God. Em i olsem wanpela tebol o wanpela pletfom we ol manmeri i mekim long graun o ol bikipela ston. Ol manmeri i save putim ol presen bilong God antap long dispela tebol. Planti taim, dispela em i min olsem ol manmeri bai kukim dispela presen. Dispela presen em i ken wanpela animal, o em i ken kaikai samting, o em i ken ol spais we i gat switpela smel.

Bipo long **ol Israel** i bin bildim **tabenakel** na **tempel**, ol Israel i bin bildim ol alta long ol kainkain ples. Orait bihain, God i bin tokim ol long wokim tabenakel o haus sel, na long dispela taim ol Israel i mas bildim ol alta insait long tabenakel tasol, na bihain long dispela, ol mas bildim ol alta insait long tempel.

Ol narapela lain manmeri we i no bilong Israel, ol tu i save mekim ol alta bilong ol long givim ol ofaring i go long ol god bilong ol.

amen

Amen em i wanpela **Hibru** wod. Em i gat kainkain mining. Em i ken min olsem “Mi wanbel long dispela,” “Dispela i ken kamap tru,” “Em i tru,” o “Tru tumas.”

Taim wanpela man o meri i tokim yu olsem wanpela gutpela samting bai kamap, yu ken bekim na tok “Amen!” Dispela em i min olsem yu tok yu hop na **bilip** olsem em bai kamap tru tru.

Taim wanpela man o meri i mekim wanpela **prea** i go long God, yu ken tok “Amen.” Dispela em i min olsem yu hop na biip olsem dispela prea bai kisim ansa.

Jisas i yusim wod amen long wanpela narapela we. Planti taim, Jisas i save tok “Amen” o “Amen, amen” long stat bilong ol tok skul bilong em. Taim Jisas i tok “Amen,” em i min olsem: “Harim gut wanem samting mi bai tok, bikos em i tru na i impoten tru.”

angel

Wanpela **enjel** em i wanpela spirit man we God i bin wokim. Ol enjel i save givim ol tok save i kam long God i go long ol manmeri, kain olsem, wanpela enjel i tokim **Maria** olsem em bai gat bel long pawa bilong God. Sampela taim, ol enjel save i givim wanpela tok save i go long ol manmeri insait long wanpela driman, kain olsem wanpela enjel i bin tokim Josep insait long wanpela driman long kisim Maria na Jisas na go ranawe i go long Ijip.

Sampela taim, wanpela enjel em i luk olsem wanpela nomol man, tasol long narapela taim, ol enjel i ken luk brait nogut tru na ol i ken sain, o ol i ken luk narakain

na mekim yumi i pret. Planti taim, namba wan samting ol i nid long tokim ol manmeri em “noken pret!”

Wanpela enjel em i ken mekim wanpela wok bilong God tu. Ol i ken helpim ol manmeri o protektim ol; kain olsem, wanpela bikpela ami enjel i bin sanap raunim [profet](#) Elisa taim king bilong Aram i bin traim long holimpasim em.

God i save yusim ol enjel tu long givim ol panismen i go long ol manmeri. Kain olsem, wanpela enjel i bin kilim ol namba wan pikinini man insait long Ijip bihain long king i bin tok nogat long larim ol **Israel** i go. Long Nupela Testamen, yumi save olsem God bai yusim ol enjel long mekim laspela jasmen bilong em.

Narapela impoten wok bilong ol enjel em long [wosipim o lotuim](#) God. Yumi painim dispela planti taim insait long buk bilong Kamapim Tok Hait o Revelesen.

Wanpela impoten taip bilong ol enjel em wanpela akenjel. Dispela em i wanpela enjel we i gat spesel [atoriti](#). Baibel i kolim tupela akenjel nem: [Gabriel](#) na Maikel.

I no olgeta enjel i bin harim tok bilong God. Sampela bilong ol enjel i bin sakim tok bilong God. Ol i kamap **nogut spirit**, na nem bilong lida bilong ol em [Satan](#).

Taim yu trensletim dispela wod “enjel,” yu mas lukaut long ol dispela samting:

Sekim na lukim olsem ol manmeri bai no inap paul long dispela wod na wod yu bin yusim long [“profet.”](#) Wanpela profet tu i save givim tok i kam long God i go long ol manmeri, tasol wanpela profet em i man, em i bilong dispela graun, tasol wanpela enjel em i wanpela spirit man na em i bilong [heven](#).

angel-of-the-lord

Wanpela enjel em i wanpela spirit man we God i bin wokim. Ol enjel i save givim tok i kam long God i go long ol manmeri. “Enjel bilong Bikpela” o “enjel bilong Yahweh” em i wanpela spesel enjel husat i save toktok wantaim bikpela [atoriti](#) na em i olsem God i toktok. Planti taim ol manmeri bai dai sapos ol i lukim pes bilong God, olsem na dispela enjel em i God yet, tasol em i kamap long ol manmeri long wanpela rot we ol i ken lukim em na stap laip yet! Planti taim ol manmeri i save pret taim ol i lukim wanpela enjel bilong Bikpela, bikos em i luk narakain na nais tru! Yumi no harim stori bilong dispela kain enjel bilong Bikpela o Enjel bilong Yahweh insait long Nupela Testamen, bikos i nogat nid long yusim em. Nau, God i yusim Jisas long toktok long yumi.

anoint

Long **anointim** wanpela man o meri em yu bai kapsaitim oil we i gat switpela smel antap long ol. Yu ken anointim wanpela samting tu.

Insait long Olpela Testamen, bipo long God i givim wanpela spesel wok, em save tokim wanpela man o meri long kapsaitim oil antap long man bilong mekim dispela spesel wok. Dispela oil em i wanpela sain bilong **Holi Spirit bilong God**. Dispela pasin kastom em i mekim klia olsem God i makim dispela man long mekim wanpela spesel wok. Em i mekim klia tu olsem God i givim dispela man spesel [atoriti](#). Dispela man em ol i kolim em “anointed” o man we God i makim. Kain olsem, God i bin tokim Samuel long anointim [Devit](#) olsem [king](#) bilong [Israel](#). God i tokim Moses long anointim Aron olsem [het pris o hai pris](#). Na God i tokim profet [Ilaija](#) long anointim Elisa olsem wanpela [profet](#) long kisim ples bilong Ilaija.

Bihain, dispela wod ‘anointed’ em ol i yusim tu long ol manmeri we God i bin anointim long mekim wanpela spesel wok, maski sapos i nogat wok bilong kapsaitim oil i bin kamap. Ol i bin kolim Jisas “anointed” o God i makim, bikos God i makim em long mekim wanpela spesel wok tru.

Ol manmeri i ken anointim ol samting tu. Ol **pris** i save anointim ol samting bilong yusim insait long [tempel](#) wantaim oil long mekim klia olsem nau ol dispela samting i gat spesel wok. Ol dispela samting nau i bilong God; ol i samting we i tambu.

Ol lain **Juda o Ju** ol tu i yusim anointing olsem wanpela samting bilong mekim olgeta de na i nogat wanpela spesel mining. Ol i bin save yusim oil i gat switpela smel long lukautim skin na gras bilong ol. Jisas i bin tokim ol manmeri olsem sapos ol i **stopim kaikai na wara o fast**, ol i mas anointim ol yet wankain olsem ol i save mekim olgeta de, na noken mekim olsem ol i luk nogut bai ol narapela lain i ken ting olsem, “Ol dispela lain i wok long fast ya, ol i fit lain tru!”

Ol manmeri i putim tu sampela oil long ol lain i kam long lukim ol long soim olsem ol dispela lain i welkam na long soim bikpela rispek long ol dispela lain. I gat tupela stori insait long ol **Gospel** we i stori long ol meri i putim oil long lek bilong Jisas long soim bikpela rispek long em.

Ol Juda lain o ol Ju, ol tu i save anointim bodi bilong man bihain long em i dai. Bihain long Jisas i bin dai, ol meri i bringim ol oil i gat switpela smel i go long [matmat](#) bilong Jisas long anointim bodi bilong em.

Insait long Nupela Testamen, ol **Kristen** bilong bipo sampela taim i bin yusim oil wantaim **prea** sapos wampela man o meri i sik. **AposeUjems**, insait long leta bilong em, i bin tok olsem sapos wampela man o meri i sik, ol narapela **biliva o bilipmanmeri** i mas pre long dispela man o meri na anointim em wantaim oil. Dispela em i no bikos oil i gat wampela kain spesel pawa, tasol bikos em i makim presens bilong God.

anoint

Ol manmeri i bin save **putim oil o anointim** bodi bilong ol daiman long soim olsem dispela ol daiman i no samting nating na long helpim ol bodi bilong daiman long smel gut taim ol i sting. Ol meri i save miksim ol spais we i gat switpela smel wantaim oil na rabim dispela i go insait long laplap o bodi bilong dispela daiman.

anoint

Taim ol manmeri i **putim oil o anointim** wampela samting o wampela ples, ol i wok long kapsaitim oil o **wain** antap long dispela samting o ples. Ol i mekim olsem bilong givim o dediketim dispela samting o ples i go long God. Insait long Olpela Testamen, Jakob i bin gat wampela **visen** bilong God taim em i bin slip na putim het bilong em antap long wampela ston. Taim em i kirap, em i anointim dispela ston wantaim oil long makim dispela ples olsem em i **holi**, bikos God i bin toktok long em long hap. Taim ol manmeri bilong **Israel** i bin mekim **tabanake**, **olpris** i bin anointim ol samting insait long tabanake long givim o dediketim ol i go long God. Nau, ol dispela ol samting em ol i kamap tambu o holi samting, na i bilong yusim long spesel wok bilong **lotu o wosip** long God.

apostle

Insait long ol **Gospel**, Jisas i bin makim 12-pela **disaipel**. Tasol insait long ol Gospel ol dispela disaipel em sampela taim ol i save kolim ol olsem ol **apospel**. Insait long buk bilong Ekts o Wok Bilong Ol Aposel, ol dispela ol seim man, wantaim sampela narapela lain, em ol i kolim ol olsem ol aposel. Wanem samting i no wankain long dispela tupela wod?

Wampela **disaipel** em i min olsem wampela man o meri husat i bin mekim komitmen long bihainim Jisas. Dispela em i no min olsem 12-pela man tasol em ol i disaipel. Ol disaipel em olgeta manmeri husat i bihainim Jisas na husat i wok long lainim samting long em.

Wampela **apospel** em i wampela man o meri husat i bin kisim wampela spesel **atoriti** long Jisas. Wampela

apospel em Jisas i makim em. Wannpela aposel em save makim Jisas na toktok.

Insait long ol Gospel, 12-pela disaipel em sampela taim ol i save kolim ol olsem ol aposel taim Jisas i salim ol i go long mekim samting. Tasol insait long buk bilong Ekts o Wok Bilong Ol Aposel, olgeta taim em ol i gat nem aposel. Dispela em i mekim klia olsem nau ol i gat atoriti. Jisas i bin givim ol wok long kontinu long mekim dispela wok we em i bin statim. Ol i no mekim wok bilong ol yet; ol i wok long mekim wok bilong Jisas.

Dispela em i wok we wampela aposel i sapos long mekim:

authority

Wampela man o meri husat i gat **atoriti** em i gat rait na pawa long mekim ol disisen na jasim ol manmeri. Nambawan atoriti we i winim olgeta narapela em i bilong God. God i givim atoriti i go long ol narapela manmeri long makim em na mekim ol disisen na jasim ol manmeri. Planti taim, God i save soim olsem em i bin givim atoriti bilong em i go long ol manmeri taim em i givim pawa long ol long mekim ol **mirake**.

Jisas i gat atoriti bikos em i **king**, na God i bin salim em i kam.

Ol aposel i bin gat atoriti insait long **sios**, bikos Jisas i bin givim long ol. Ol narapela manmeri i nid long ekseptim ol disisen bilong ol.

Baibel i gat atoriti bikos God i wok long yusim Baibel long toktok long ol manmeri. Dispela em i min olsem ol manmeri i mas harim wanem samting God i tokim ol insait long Baibel.